

E vakalougaatataki keda o Koya ena yalomatua me da lewa vakamatau na veika lalai e tu vei keda, na yalomatua me rawa kina ni da bula vakavinaka cake ena 90 na pasede ni keda isau mai na 100 na pasede. Ni vaqori, era na kila vinaka na dau saumi ikatini vakkadodonu na ivakarau ni bula manini ka rawa me ra bula rawati ira.

Au sa qai kila ni nona veivakalo-ugatataki cecere duadua na Turaga era ka vakayalo, ka dau baleta na matavuvale, na itokani, kei na kospipeli. E vakavuqa ni vaka me dau vakalougaatataki keda ena yalo e dau kidava vakatotolo na veivakauqeti kei na veituberi ni Yalo Tabu, vakauasivi ena bula vakawati kei na veika e baleta na matavuvale me vaka na susu gone. Na kidava na ka vakayalo oqori ena rawa ni vuksi keda me da marautaka na veivakalougaatataki ni duavata kei na sautu e vale. E vakatura o Peresideti James E. Faust ni saumi ni ikatini e dua na inisua vakasakiti mai na veisere (raica na James E. Faust, "Enriching Your Marriage," *Liahona* kei na Ensign, Epe. 2007, 2–6).

Na saumi ikatini e vuksi keda me da tara cake e dua na yalo talairawarawa ka malumalumu, kei na dua na yalo dau vakavinavina ka dau "vakatusa . . . ni sa bulia na ka kecega na Kalou" (V&V 59:21). Na saumi ikatini ena vakavurea e lomada na yalo soli-soli ka dau veivosoti kei na yalo dau-loloma ka sinai ena loloma savasava i Karisito. Ena yaco me da taleitaka me da vakalougaatataki ira na tani ena dua na yalo talairawarawa, ki na loma ni Turaga. O ira era dau saumi ikatini e veigauna era na raica ni na vaqaqacotaki na nodra vakabauti Jisu Karisito ka tara cake e dua na ivakadinadina tudei ka veivesuki me baleta na Nona kospipeli kei na Nona Lotu. E sega ni dua vei ira na veivakalougaatataki oqo e ka vakailavo se ka vakayago, ia e dina sara ni sai ira oqo na veivakalougaatataki cecere duadua ni Turaga.

Au vakadinadina taka ni da sauma ena yalodina na noda ikatini, ena dolava na Turaga na katuba mai lomalagi ka sovaraka mai vei keda na Nona veivakalougaatataki cecere duadua. Ena yaca i Jisu Karisito, emeni. ■



Mai vei Elder Lynn G. Robbins
Ena Vitusagavulu

A Cava na iValavala ni Tagane kei na Yalewa sa Kilikili Kei Kemudou?

Me vuavuai vinaka na nomuni sasaga mo ni tara cake na itovo ni bula Vakarisito, me rawa ni laurai kina ena kemuni irairai na kena iyalo yalo ka vakaimawe ena nomuni itovo na ivakarau ni Nona bula.

Edua na taro uasivi oqo "Mo Vakakina se mo sega ni vakakina?"¹ A biuta na taro oqo na iVakabula ena dua na kena ivakarau cecere, sa yaco kina me taro titobu vakaivunau vei keda yadua: "A cava na ivalavala ni tagane [kei na yalewal] sa kilikili *kei kemudou?* Au sa kaya vakaidina vei kemudou mo dou *vakataki Au*" (3 Nifai. 27:27; vakaikuritaki). Ni cavuti taumada na iyatuvoisa oqo, na vu ni vosa *kilikili* ena vakaqo *vakataki Au*. E sureti keda o Koya meda taura na yacana kei na Nona ivalavala.

Meda *vakataki Koya* sa dodonu meda *cakava* talega na veika *a cakava* ko Koya: "Au sa kaya vakaidina vei kemudou oqo na noqu ivakavuuli; ia dou sa kila na ka sa dodonu mo dou *kitaka* ena noqu lotu; ia mo dou *kitaka* na ka kecega dou sa raica niu sa *kitaka*" (3 Nifai 27:21; vakaikuritaki).

Na *vaka* kei na *kitaka* erau sega ni na tawase rawa. Erau dau

veivaqaqacotaki ka veivakatataki cake vakataki rau me vaka ni rau ivunau drua. Me vaka beka oqo, na vakabauta ena vakauqeta e dua me dau masu, ia na masu ena vaqaqacotaka na nona vakabauta.

Na iVakabula e vakacalai ira o ira era dau *kitaka* ka sega ni *yaco me vakakina*—ka vakatokai ira me ra dauveivakaisini: "Ko ira na tamata oqo era sa vakarokorokotaki au ena tebenigusudra, ia na yalodra sa yawa tani vei au" (Marika 7:6). *Mo cakava* ka sega ni *vakakina* e veivakaisini, se vakamatavulo ena dua na ivakarau e sega ni nomu—mo vakalasulasui iko.

Ena veivosaki na *vakaka* sega kina *na kitaka* e sega ni vakabau, me vaka na "vakabauta kevaka sa sega ni tu vata kei na cakacaka, *sa mate ga* ni sa tu duadua *ga*" (Jemesa 2:17; vakaikuritaki). *Na vakakina* e sega kina *na kitaka* e sega dina ni *vakakina*—eda sa cavilaki keda tikoga vakataki keda, ena nona vakabauta tiko e dua ni sa

vinaka, baleta walega ni vinaka na veika e gadreva.

Na kitaka ka sega ni *vaka* —e ivakaisini— e boroya vei ira na tani e dua na iyalojalo lasu, ia na *vaka* ka sega na *kena cakacaka* e boroya e dua na iyalojalo lasu vei keda vaka-taki keda.

A vosataki ira na Farisi kei na vunivola na iVakabula me baleta na nodra veivakaisini: “Ena ca vei kemudou na vunivola kei na Farisi, na dauveivakaisini! ni dou sa solia na ikatini”—e dua na ka era dau *cakava* —“ni botebotekoro kei na co vakaoqo, ia dou sa biuta laivi na veika bibi ena vunau, na ivalalava dodonu, kei na loloma, kei na vakadinata” (Maciu 23:23). Era sega ni rawata me ra *vaka* na ka e dodonu me ra *vakakina*.

E dina ni raica o Koya na bibi ni *kitaka*, e vakaraitaka na iVakabula ni ka “bibi cake” meda *vakataka*. Na kena bibi levu cake na *vaka* e koto ena ivakaraitaki eso oqo:

- E dua na ka eda *cakava* o ya na noda sobu ki na wai ni papitaiso. Na *vaka* e dodonu me tarava mai sai koya na vakabauti Jisu Karisito kei na veisau levu ni yaloda.
- Na vakaivotavota ena sakaramede e dua na ka eda dau *cakava*. Na *noda* bula kilikili me rawa kina vei keda, e levu ka bibi cake sara.
- Na veitabaki ki na matabete e dua na ivalalava se *cakacaka*. Ia na ka bibi cake, sai koya na kaukauwa ni matabete ka yavutaki ena “ivakavuvuli ni buladodonu” V&V 121:36, se *me vaka*.

E vuqa vei keda era bulia na veika *me caka* me vakananumi kina vei keda na veika eda vinakata meda cakava. Ia e dau vakavudua sara ni tu na nodra ituvatuva ni veika me ra *vaka*. Baleta na cava? Na veika *me caka* era itaviqaravi se soqo ka rawa ni toqai ena ituvatuva ni ka sa *caka oti*. Ia, na *vaka*, e sega ni dau caka. O na sega ni rawata na itoqa *ena vaka*. Au rawa ni kauti watiqu ki na dua na bogi ni gadi vakasakiti ena Vakaraubuka oqo, oqori *ena caka*. Ia *mo yaco* mo tagane vakawati vinaka e sega ni dua na ka

me caka; e dodonu meu *vakakina* me tiki ni noqu bula, me noqu ivakarau tudei se ocei koi au.

Se niu itubutubu, na gauna cava e rawa niu toqa laivi kina e dua na gone mai na noqu ituvatuva ni sa *caka oti*? Ena sega ni oti rawa ena dua na gauna na noda *vaka tiko* na itubutubu vinaka. Ia meda itubutubu vinaka, e dua vei ira na ka bibi duadua e rawa ni da vakavuvulitaka vei ira na lueda na ivakarau me ra *vaka* vakalevu cake kina na iVakabula.

E sega ni rawa ni laurai na noda vinakata meda *vaka* na Karisito, ia oqori na kaukauwa e veivakauqeti tiko ena veika me *caka*, ka rawa ni laurai. Ni dua na itubutubu e vukea tiko na luvena me vulica na lako, me kena ivakaraitaki, eda raica ni *cakava* tiko na itubutubu, na nona vakataudeitaka ka vakacaucautaka na luvena. Na *veicakacaka* oqori e vakavotuya na loloma sega ni laurai e tu e yalodra, kei na nodra vakabauta sega ni rairai kei na vakanuinui ena vuku ni veika ena rawata na luedra. Ena tomani tiko e veisiga na nodra sasaga—na ivakatakilakila ni *vakakina* sega ni rairai ni vosota kei na gugumatu.

Me vaka ni vakasucuma na *cakacaka* na *vaka* ka dau veivakauqeti ena *cakacaka*, ena vakavinakataka vakalevu cake na itovo na vakavulici ni *vakakina* mai na noda vakanamata ena *cakacaka*.

Ni ra sega ni vakaitovotaki ira na gone, taura mada ni ra veivala vakataki ira, e vakavuqa ni da nau vagolea cala na noda veivakadodonutaki ena ka era *cakava* se na veivala eda a raica. Ia na *ka e caka*—na nodra itovo—e ivakaraitaki walega ni veivakauqeti sega ni rairai e yalodra. Eda na tarogi keda beka, “Na veika cava soti, kevaka e kila na gone, ena vakadodonutaka na itovo vakaoqori ena veigauna mai muri? Na nau vosota vakadede kei na veivosoti ena gauna e cudru kina? Dauloloma ka dautataro? Meda lewai keda vakavinaka ena noda ivalalava ka kakua ni dau veibeitaki?”

Era na vakavulica vakacava vei ira na luedra na ivakarau ni bula oqo o ira na itubutubu? Ena sega tale ni dua na madigi vinaka cake meda

vakavulica kina vei ira na lueda na ivakarau ni bula Vakarisito mai na ivakarau eda na vakadodonutaki ira kina. Na vosa vakavalagi ni *veivakadodonutaki* e vu mai na vosa vakavalagi ni *tisaipeli* ka kena ibalebale na noda vosota vakadede kei na veivakavulici. Me kakua ni vakayacori ena cudru. E rawa ka dodonu meda veivakadodonutaki me vaka e vakavuvulitaki vei keda ena Vunau kei na Veiyalayalati 121 ena “veivakauqeti, na vosota vakadede, na yalomalua, na yalomalumalumu, kei na loloma e sega ni veivakaisini; ena yalo veidokai kei na yalomatua (tikina e 41–42). Oqori kece na *vakakina* Vakarisito e dodonu me tiki ni noda bula, *ni da* itubutubu ka *tisaipeli* i Karisito.

Ena vulica na gone na isau ni ivalala mai na veivakadodonutaki. Ena vinaka meda vukica na ca ki na vinaka ena veigauna vakaoqori. Kevaka e vakatusa na nona cala e dua na gone, vakacaucautaka na nona yaloqqa me vakatutusa. Taroga na gone na veika e vulica mai na cala se na baleca ka rawa kina vei iko, vakauasivi cake na Yalotabu na madigi mo tarai koya ka vakavulici koya kina. Ni da vakavulica vei ira na ivunau ena Yalotabu, na ivunau oqori e tiko kina na kaukauwa me veisautaka na nodra bula ni *vaka* ena kena gauna.

A raica rawa o Alama na ivakavuvuli vata oqo, ni “laki vunautaki vei ira na vosa ni Kalou, *me ra* veivutuni kina ka ivalalava dodonu—raica, sa gata na vosa ni Kalou, ka mucu na iseleiwau (Alama 31:5; vakaikuritaki). Baleta na cava? Baleta na iseleiwau e kila ga na itovo ni veivakatotogitaki—se *cakava*—ni vunautaki na vosa ni Kalou e veisautaka na bula ni tamata—o cei o *ira* se o cei e rawa ni ra yaco me *vaka*.

Na gone talei ka talairawarawa ena vakavulici vakavinaka walega e dua na tama kei na tina ena iTavi Vakaitubutubu. Kevaka o vakalougatataki ena dua na gone ka na vakanovolea vakaukauwa sara na nomu dauvosota, o na vulica Vakavinaka Cake Sara kina na nomu iTavi Vakaitubutubu. Kakua ni taroga se cava o a cakava ena nomu bula taumada mo mai sotava kina na

gone vakaoqori, mo vakasamataka ni o vakalougaatataki ena gone dredre oqori ka soli kina vei iko na madigi me va-Kalou cake kina vakalevu na nomu bula. Mai vei ira na gone ena vakatovolei, vakatorocaketaki ka vakasavasavataki kina na nomu vosota kei na dauvosota vakadede kei na ivalavalala tale eso ni bula va-Karisito? E rawa beka ni o gadreva vakalevu na gone oqori me vaka ga na nona gadrevi iko o koya?

Eda sa rogoca kece na ivakasala meda cata na ivalavalala ca ka sega o koya e ivalavalala ca. Ka vakakina, ni ra baleca na lueda meda qarauna me kakua ni tau na vosa era na nsuma kina ni sai *ira* na veika cala era *cakava*. “Kakua ni laiva me yaco na malumalumu me kedra ivakatakila-kila me vaka na “lialia”—“berabera”—“vuesa” se “sakulevu.”² O ira na lueda era luve ni Kalou. Oqori na kedra ivakatakila-kila dina kei na ka era rawata. Na nona inaki sai koya me vupei ira na Luvena me ra lakosivita na nodra malumalumu kei na nodra cakacala ka toso yani ka yaco me *vakataki Koya*. O koya sa yaga kina me laurai na ivalavalala vakatuburarawa me ka vakawawa ga—sega ni tudei, e dua ga na ivalavalala ka sega ni ivakatakila-kila.

Sa dodonu kina meda qarauna na noda vakayagataka na veimalanivosa tudei me vaka “O dau . . .” se “O sega vakadua . . .” ena nomu veivakadodnutaki. Qarauna na veimalanivosa me vaka na “O sega ni bau dau nanumi au” se “na cava me keitou dau waraki iko kina e veigauna?” Na veimalanivosa vakaoqori e dau laurai kina me ivakatakila-kila na ivalavalala e vakayacori ka na vakacala na nona ivakarau ni vakasama kei na nona nuitaki koya na gone.

E rawa talega ni yaco na veilecayaki ni da taroga e dua na gone se cava ena *via cakava* ni sa tubu cake, me vaka beka ni kena *ituvaki* e dua na tamata ena vakatau ena ka e *cakava* me rawata kina nona bula. Ena sega ni vakatakila-kila na nona bula se na kena yaga e dua na tamata ena nona cakacaka se na veika e tau-kena. Na iVakabula e dua na matai



yalomalumalumu, ia oqori e sega ni vakatakila kina na Nona bula.

Ena noda vukea e dua na gone me kilai koya ka vaqaqacotaka na kena yaga, e rawa ni da vakacaucutaka ena kena ivakarau dodonu na veika era rawata se nodra itovo—*na cakacaka* ia ena daumaka cake sara kevaka e vagolei na noda veivakacaucautaki ena nodra ivakarau ni bula kei na nodra vakabauta—*o cei o ira*.

Ena qito, e dua na ivakarau uasivi me vakacaucutaki kina nodra vakaitavi na lueda—*cakava*—ena rai ni *vaka*—me vaka nodra igu, sega ni guce, tu vakarau e matana na meca, kei na so tale—oqori eda sa vakacaucutaki rau ruarua kina na *vaka* kei na kena *caka*.

Ni da kerei ira na gone me ra *cakacaka* e vale, e rawa ni da vaqara na veisala eso meda vakacaucutaki ira kina ena nodra *vakakina*, me vaka na, “Au dau marau ni o cakava na nomu cakacaka ena yalo dina.”

Ni taura e dua na gone na kadi ni ripote mai koronivuli, e rawa ni da vakacaucutaki koya ena nona maka vinaka, ia ena yaga vakalevu sara me vakacaucutaki ena nona *gugumatua*: “O dau solia lesu tale na nomu ilesilesi ni cakacaka ni vuli. O iko e dua e kila me cakava ka vakaotia na veika dredre. Au marautaki iko.”

Ena gauna ni wili ivolanikalou, vakaica ka veitalanoataka na ivakarau ni bula a kunei ena nomudou wiliwili ena siga ko ya. Me vaka ni ra isolisolai vua na Kalou na ivalavalala va-Karisito ka sega ni rawa ni vakatorocaketaki ke sega na Nona veivuke,³ ena masu vakamatavuvale kei na masu yadua, masulaka na veisolisoloi oqori.

Dou dau veitalanoataka ena gauna ni vakayakavi na ivakarau ni bula, vakauasivi na kena dou a raica mai na ivolanikalou ena mataka o ya. “Ena ivakarau cava beka o itokani vinaka kina nikua? Na sala cava o vakaraitaka kina na nomu yalololoma? A vupei iko beka vakacava mo sotava na bolebole ena siga nikua na vakabauta? Ena ivakarau cava beka o a nuitaki? dina, lomasoli, yalomalumalumu kina?” E levu tu ena ivolanikalou na ivakarau ni bula me vakavuvulitaki ka vulici.

Na sala bibi duadua meda vakavuvulitaka kina na *vakakina* sai koya *me da* itubutubu vinaka vei ira na lueda me vakataki Tamada Vakalomalagi vei keda. O Koya duadua ga na itubutubu sa uasivi sara ka sa wasea tu vei keda o Koya na nona ivoladusidusi vakaitubutubu—na ivolanikalou.

Na noqu vosa nikua a vagolei tiko vakatabakidua vei ira na itubutubu, ia na kena ivakavuvuli e baleti keda kece. Me vuavuvi vinaka na nomuni sasaga mo ni tara cake na itovo ni bula Vakarisito, me rawa ni laurai kina ena kemuni irairai na kena iyaloyalo ka vakamawe ena nomuni itovo na ivakarau ni Nona bula. Ia, ni ra vakila na nomu loloma ka raica na nomu itovo na luvemu kei ira tale eso, sa noqu masu kei na ivakadinadina, ni na dreti ira Vua, oqori na noqu masu ka noqu ivakadinadina, ena yaca i Jisu Karisito, emeni. ■

IDUSIDUSI

1. William Shakespeare, *Hamlet, Prince of Denmark*, act 3, scene 1, line 56.
2. Carol Dweck, cavuti ena Joe Kita, “Bounce Back Chronicles,” *Reader’s Digest*, Me 2009, 95.
3. Raica na *Vunautaka na Noqu Kosipeli: E Dua na iDusidusi ni Veigaravi ni Daikaulotu* (2004), 129.